

جریدہ علیہ

مشیتِ جلیلہ، اسلامیہ نمک، جریدہ، رسمہ سیدر

اوائل صفر ۱۳۳۳

عدو: ۸

آیدہ بر نشر اولور

برنجی سنہ

نطق افتتاحی، نمایون



- « محترم اعیان و مبعوثان »
« اوچنجی انتخابات اوزرینہ کچن تشرین ثانی بدایتندہ اجتماعی لازم ککن مجلس ملی نك »
« برآی تأجیلدن صوکرہ برنجی دورہ اجتماعیه سنی کشادہ بنی موفق بیوران جناب حقہ »
« حمد و ثنا ایدر و سزله بیان خوش آمدی ایلرم »
« دولترلہ اولان مناسباتمزہ وقت وقت اجرای سوء تأیرون خالی قالمیان مسائل »
« معلقہ بی برطرف ایدرک خارجی غوائل و مشکلاتک امکان ظهورینی ازالہ ایلہ اصلاحات »
« و ترقیات داخلیه کریمی تام و یرمک و بوسورتله بالقان حربنک موجب اولدینی »
« ضایعات و مصائبی برآن اول تلافی ایلک اوزرہ صرف مزید غیرت ایتمکده ایکن »
« آوروپادہ صلح عمومینک واسع مقیاسده مختل اولمسندن متولد بحران عظیم اوزرینہ »
« حقوق و منافع سیاسیه مزک مدافعه و محافظه سی مسئلہ سی بالطبع هر شیئہ تقدم ایتمکده »
« اعلان بیطرفی ایلہ برابر عموم قوای بریه و بحریہ مزک سفر بر حاله وضعی اراده ایتدم »

« حکومت سنیہ من اختیار ابتدیی مسلح بیطرفلقده ثباته عزم ایتش ایکن دونمای
 « هایونمز قره دکزده روس دونماسنک تجاوزاتنه دوچار اولمش ومتعاقباً روسیه وانکلتره
 « وفرانسه دولتری حدودلریمز عسکر ودونما سوق ایله فعلاً مخاصماته باشلامش
 « اولدقرندن عون باری وعنایت پیغمبری به بالتوسل دول مذکوریه قارشی حال حربی
 « اعلان ایله حدودلرده کی اردولریمه ایلری حرکت امرینی ویردم . »

« روسیه فرانسه انکلتره دولترینک عالم اسلام علیهنده اوتہ دنبیری تعقیب ایدم کلدکری
 « سیاست احکامکارانه نک سلاح قوتیله رفعی فریضه دینه حکمنی آلدیغندن اصدار اولنان
 « فتاوی شریفه موجبجه بالجمله مسلمینی بونلرک ومعاونی اولان دوللرک علیهنه جهاده
 « دعوت ایلدم . »

« اردوی هایونک حدودلرده ودونما منرک قره دکزده کوستردیکی شجاعت وبسالت
 « تاریخمزک مأثر قهرمانانه سی میاننده اک بیوک بر موقع طوته جقدرد . »

« سفر برلک امرینه قارشی کوستریلن اجابت سریعه ومنتظمه ولوازم عسکریه
 « تدارکنده اظهار اولنان غیرت فوق العاده ملتزمک مدافعه وطن اوغرندہ متحد برکتله
 « حمیت اولدیغنی اثبات ایتش وبو حرکت علویه وطنپرورانه بحق شایان تقدیر بولمشدرد .
 « مجلس ملیمزک دخی مذاکرات واجتهاداتنده عینی اتحاد و اتفاق آثارینی ارئه ایدم جکنی
 « امید ایدر وتخصیصات عسکریه به متدائر وتوزین قوا اساساتنه متعلق قوه اجرائیه مزجه
 « تکلیف اولنه حق قانون اساسی تعدیلاتنک وقوانین سائرہ لایحه لرینک سرعتله تدقیق
 « ایدلمسنه انتظار ایلرم . »

« معظم متفقلر منر آلمانیا وآستریا-مجارستان دولترینک شانلی اردولری طرفندن
 « مشترک دشمنلره قارشی آوروپاده احراز اولنان مظفریات متوالیه به قوای بریه وبجریه مزک
 « وامر شرعی ایله روسیه ، انکلتره وفرانسه به قارشی جهاده دعوت ایدیلن مجاهدین
 « اسلامک آسیا وآفریقاده پارلاق ظفرلر علاوه ایدم جکنه وبوندن صکره جناب حقک
 « محافظه حق وعدل ایچون سلاحه صارلمش اولان دولت علیه مزه وچارا قطار جهانده کی
 « اسلاملره شرف وسعداته مبشر براستقبال بخش ایدم جکنه معتقدم . »

« دولتمزجه وقتیله اجانبه بخش اولنان مساعدات مخصوصه آنا فائداً اشکال ومقاصدینی
 « تبدیل ایدرک حقوق حکمرانیمزی خللدار ایدیجی بر ماهیت مضره اکتساب ایلش
 « اولدیغندن حقوق بین الدول اساساتندن هیچ برینه تماس ایتمیان وقاپیتولاسیون نامی

- « آئنده اجتماع ایدن بالجله امتیازات اجنبیه نك رفعی اراده ایدرك دول سائرده »
 « اولدینگی کبی ممالك شاهانه مده دخی اجانب وبونلره متعلق معاملات حقنده حقوق »
 « بین الملل احکامنك تطبیقی اصولی وضع ایلدم . »
 « حرب عمومی یه اشتراك ایتمین دول معظمه وحکومات سائر وبالخاصه قومشومن »
 « بلغارستان ایله مناسبات سیاسیه منرك کماکان خالصانه ودوستانه اولدینگی مع الممنونیه »
 « بیان ایدرم . »
 « سلامت دولت ومملکتیه مصروف اوله جق مساعیکزك توفیقات ربانیه یه مظهریتی »
 « جناب حقندن نیاز ومجلس عمومی یی کشاد ایلرم . »

*
*

مجلس اعیانك عریضه جوابیه سی

شوکتلو پادشاهمز خلافتپناه اقدیمز حضرتلری

برآی تأجیلدن صوکره مجلس عمومینك حضور هایون ملوکانه لریله دوره حاضره
 اجتماعیه سنك کشادی مناسبتیه مظهر عز خطاب مستطاب شهریاریلری اولان مجلس
 اعیان التفات جلیل پادشاهیلرندن دولای کمال اخلاص وصمیمیتله عرض تبریکات ایدر
 وامثال عدیده سنی ادراکه مظهریت شاهانه لرینی لطف باریدن نیاز ایلر .
 اراده وفرمان بیورلدینی اوزره بالقان محاربه الیمه سندن دولت علیه لرینه آچیلان رخنه لرك
 ترمیمه واصلاحات لازمه اجراسیله قوای دولت ومملکتك احیاسنه چالیشلدینی برزمانده اوروپا
 دول معظمه سی میاننده حرب عمومی ظهور ایتمش ودولت علیه لری بوکیرودارعامه نك تأثیرات
 محتمله سنه قارشى تدابیر تیقظیه یه توسل ایتمکه برابر بیطرفلغی اعلان ایله مش ایکن
 طرف اشرف ملوکانه لرندن بیان بو یورلدینی وجهله معروض اولدیغمز تجاوزات
 منتج حرب اولغله آرتق تبعه شاهانه لرینك بلا استتایکدل ویک جهت اوله رق دفع
 صائل ومدافعه وطن اغورنده هر درلو فداکارلنی اختیار وصرف ماحصل اقتدار
 ایله مه سی عین فرض اولمش واصدار قلنان فتاوی شریفه موجبجه منحصراً محارب
 بولوندیغمز دولتر علیه نه اعلان بو یوریلان امر جهاد بوفریضه یی بردرجه دها تأیید
 ایتمش وشو خصوصلرده بالعموم ملتجه کوستریلان سرعت اجابت و ابراز اولونان آثار

حیث هیأت عاجزانه مزجه موفقیات منتظره آتیہ ایچون براءت استہلال عد اولونمقدمہ بولونمشدر .

نطق جلیل پادشاهیلرنده بیان بیورولدینی اوزره مدافعه وطن اوزرنده سلاحہ صاریلش اولان عساکر بریه و بحریه شاهانه لرینه و معظم متفقلریمز آلمانیا و اوستریا - مجارستان اردولرینه نصرت الہیہ نك توالی تجلیاتی حقنہ کی اعتقاد خلافتناہیلری انعکاساتی ایله قلوب صادقانه مز لبریز امید و مسرت اولمشدر .

عصیرلردن بری دولت علیہ لرینک استقلال سیاسی و اقتصادیسنی خللدار ایدن وفی الحقیقہ حقوق بین الملک هیچ براساسنه تماس ایتمین قاپیتولاسیونلرک الغاسی صورتیلہ مملکتک انکشافات مستقبلہ سنہ بر ساحه سرلستی آچلمہ سی عہد ہایون ملوکانه لرینی رونق یاب ایدہ جک اجراءات مهمہ دن اولغله بوندن دولای عتبہ سنہ لرینہ عرض شکران ایلرز .
بحولہ الکرم اردو و دونانمای ہایونلرینک اظہار ایلدیکی شجاعتی آوردہ لسان شاباش ایدرک خیر و نصر ایله باشلایان شو حربک عون الہی و امداد روحانیت جناب پیغمبری ایله فتح تام مینہ اقتران ایتہ سی تضرعاتی درگاہ کبریایہ رفع ایلرز .

شو بحران سیاسی ایچندہ بی طرف بولونان دول معظمہ و حکومت سائرہ و باخصوص قوم شومز بولغارستان حکومتی ایله مناسباتمزک خالصانہ و دوستانہ اولدینی حقنہ کی بیانات شاهانه لرہی ہیأت عاجزانه مزجه بادی منوینت اولوب منافع دولت و ملتہ موافق اولان یوسیاست مدبرانہ دم دوام ایدیلہ چکنہ قناعت چا کرانہ مز برکالدر .

تخصیصات عسکریہ و توازن قوا اساسلرینہ متعلق لایمجلہ لرلہ تودیع اولنہ جق لوایح سائرہ قانونیہ بی دم منافع دولت و مملکتہ موافق بر صورتہ تدقیق و تمشیہ بذل مقدرت و علی قدر الامکان التزام سرعت اولونہ جغنی تمہید ایدر وبالوسیلہ عتبہ بلند ملوکانه لرینہ احتیاسات رقتکارانہ مزی ازسرنو عرض ایله کسب افتخار ایلرز . »

*
**

مجلس مبعوثانک عریضہ جوابیہ سی

شو کتہ آب و خلافتناہ اقد من حضر تلی

بر آی تأجیلدن صکرہ مجلس ملینک برنجی دورہ اجتماعیہ عادیه سنی عون حقہ کشادہ موفقیات شہریاریلرندن طولای مجلسمز خا کپای شاهانه لرینہ عرض تشکرات و تبریکات ایلرز .

یاد الہی یورکر مزی صیزلاتان بالقان مصائبک تلافیسی ایچون اصلاحات و ترقیات داخلہ مزی تأمین ایله مشغول اولدیغمز بر صرمدہ آوروپادہ ظہور ایدن حرب عمومی اوزرینہ حکومت سنیہ لرینک — ہر آن وزمان سببیز و حقسنز تجاوزاتہ معروض اولان — حقوق و منافع سیاسیہ عثمانیہ و اسلامیہ بی محافظہ و تأمین ایتک اوزرہ عموم قوای بریہ و بحریہ عثمانیہ بی سفر بر حالہ وضع ایتسی و جائیدن ایدی. بوفریضہ نک و قتیلہ و خقیلہ یرینہ کتیرلش اولسی کتاب موفقیات جلیلہٗ خلافتناہیلرینک فصول شعشعہ دارندن بری عد اولونسہ بحاردر . دولت علیہ بیطر فلغنی اعلان واوندہ ثباتہ عزیم ایلش ایکن اوتہ دتبری اسلامیہ و عثمانیہ لغلہ دشمن بر سیاست تعقیب ایلہ یں روسیہ و انکلترہ و فرانسه دولت لرینک فعلاً مخاصمتہ دوچار اولسی اوزرینہ توفیق ربانی و امداد روحانیت پیغمبری یہ استداداً حال حرب اعلان ایلش و بوضورتلہ صلحک اخلا لیدن ترتب ایدن مسئولیت معنویہ دن دولتمز وارستہ قالمشدر کہ بودہ کیردیکمز شو معرکہ دم بزم ایچون حسن عاقبتہ براعت استہلال اولہ حق الطاف لدنیہ رحمانیہ دندر . مسلمان دشمن لرینک سلطنت سنیہ لرینہ متفقاً هجوم ایتدکلری بر زماندہ جہاد اعلانیلہ روی زمیندہ موجود اولان اہل توحیدک طرف اشرف خلافتناہیلرندن شو فریضہ دینیہ بی ایفایہ دعوت بویورولمہ سی ، نور نوارینک قیامتہ قدر بقاسی تبشیر الہیسیلہ مبشر اولدیغمز خلافت جلیلہٗ اسلامیہ نک ہم حق و ہم دہ وظیفہ سی ایدی . بویلہ بر امر عظیم و مهمک فتاویٰ شریفہٗ شریعت غرایہ موافقت و اقترا نی سلطنت سنیہ لرینک علوشانہ و اسلامک فلاح و نجات قریب و مستقبلہ دلیل اتخا ذ ایدیلسہ احرادر .

مسلمانلر ایچون جہاد فتح و تخریب بلاد و اہلاک ائم و عباد ایچون دکل آنحق حمایہ حق ایچون فرض قیلندیغہ ویر یوزندہ یوزلرچہ میلیون نفوس اسلامیہ موجود ایکن دوام حکم اسلام اک بیوک ہر حق اولدیغہ و بو حقک ادامہ و اقامہ سی ایسہ ہر کسدن اول عثمانیلرہ ترتب ایتدیکنہ کورہ اسلامک عزتی نامنہ سلطنت سنیہ لرینک بقاسی و وطن عزیزمزنک محافظہ سی یولندہ بذک نفس نفیسہ جملہ مملکت خلقتک ہر زمان آمادہ بولندیغنہ ، سفر برلک امرینہ عموم ملتک کمال خواہشلہ کوستردیکی اجابت و اظہار ایتدیکی آثار غیرت بر دلیل باہر در . ایشتہ بو حقک اعلا سی و وظیفہٗ دینیہ نک ایفاسی ایچون عصر لردنبری ادعای اسلامہ قارشی مجاہدہ یہ تشنہ اولہ رق دولتمزہ امدادہ حاضر و بزدن استمداد ایلہ آنحق دعوت خلافتہ منتظر بولتان اوچوز میلیون مسلمانک جانب جلیل خلافتناہیلرندن مذکور اوچ دولت ایلہ معاونلری علیہنہ اعلان اولتان جہادہ در حال اجابت ایدہ جکی شمدی یہ قدر کوزلمکدہ اولان آثاریلہ ظاہر در .

اردو و دو نمامزك دشمنلره قارشى كوسترمكده اولدقلى آتار شجاعت و بسالت موروث اجداد اولان قهرمانلغك شو دقيقه مهمه ده تكرار جانلاندیغنى كال فخر ايله تجلى ايتديرمكده در . مجلس مليمز بالمله مذاكرات و مقرراتنده عين حس وفاق و اتحاد ايله مشحون اوله رق بو آن مهم تاريخيده وظيفه سنى حسن ايفايه ساعى اوله جقدر .

محافظه حق و عدل ايچون سلاحه سارلمش اولان دولت عليه عثمانيه ايله دعوت جهاده اجابت ايليان مجاهدین اسلاميه و معظم متفكر منر آلمانیا و آوستريا و مجارستان اردولرينه جناب حقل بخش نصرت و فتوحات ايله جكنه اعتقاد منر بر كالدر .

هيچ براساس حق و عدله مستند اوليان و موجوديت عهديه سى بيله قالميان عهد و عتيقه بك الغاسى مملكت ايچون محض خير و حكمت و شايان تجليل بر موفقيتدر .

دولتمزله مناسبات حسنه محافظه ايتمكده اولان دول معظمه و حكومات سائر و بالخاصه قومشومنر بلغارستان ايله روابط دوستانه مزك ادامه سى مجلس مزجه اقدم آمالدر .

هر حال و كارنده عون الهى يي پناه و روحانيت پيغمبرى يي مدد كاه اتخاذايدن مجلس اعلان سيورلمش اولان جهاد مباركى تقدیس ايله مظهر توفيقات ربانيه اولملرى دعاسنى تكرار ايلر .

فتاوى شريفه

تکاح :

زيد مسلم كتابيه اولان هند نصرانيه حريميه يي تزوج ايتك مع الكراهه صحيح اولورمى الجواب : اولور .

*

**

هندك زوجى زيد آخر دياره كيتد كد نصكره عمرو كلوب زيد فوت اولدى ديوهنده اخبار ايلسه عمرو عدل اولوب هند اينايحق بعد انقضاء العده نفسى آخره تزويجه قادره اولورمى الجواب : اولور .

*

**

هندك زوجى زيد آخر ديارده ايكن برقاج كسنه لر كلوب زيد فوت اولدى ديوهنده اخبار ايلسه لر هند اينايحق بعد انقضاء العده نفسى آخره تزويجه قادره اولورمى الجواب : اولور .